

KL terancam tanpa Hutan Simpan Kekal

Pendedahan BH mengenai Hutan Simpan Kekal (HSK) Bukit Sungai Puteh dan Bukit Nanas di Kuala Lumpur sedang diintai pemaju dan bakal dibangunkan suatu yang sangat membimbangkan.

Seluruh warga kota dan rakyat Malaysia perlu membuat bantahan keras jika perkara ini bakal berlaku. Jumlah keseluruhan HSK yang asalnya berkeluasan lebih 100 hektar, kini telah berkurangan hampir 40 peratus. Jumlah ini terlalu kecil bagi sebuah bandar raya di rantau tropika.

Di kebanyakan kota raya hebat dunia, mereka sedang bertungkus lumus meningkatkan kawasan hijau, terutama hutan dan merancang penempatan bersifat mesra penghuni. Kita tidak habis-habis merosak dan memusnah hutan warisan alam atas nama pembangunan.

Sebagai negara yang terletak di rantau tropika lembap dan dihiasi dengan hutan hijau tropika, Kuala Lumpur elok menjadi contoh dunia, sebagai pembangunan bandar dihiasi hutan. Kita seharusnya mempunyai mimpi, setiap bandar di Malaysia dirancang tersulam antara bangunan dan hutan asli.

Kuala Lumpur berpeluang dan boleh menjadi contoh 'bandar raya dalam hutan'. Dasar pembangunan bandar perlu memberikan perhatian yang serius mengenai keseimbangan antara kawasan pembangunan prasarana dan kawasan hijau.

Kehadiran beberapa taman seperti Taman Tasik Perdana dan Taman Tasik Titiwangsa masih belum memadai. Beberapa taman lebih kecil perlu dibina di antara satu pusat bandar dengan pusat yang lain. Pada masa yang sama, sepanjang permatang bukit dan zon penampungan lebuhraya, konsep Hutan Simpan Bandar (HSB) boleh diperkenalkan.

Memandangkan landskap Kuala Lumpur terdiri daripada jalinan dataran limpah Sungai Kelang, bukit dan permatang perbukitan. Semua kawasan bukit dan permatang eloknya dikekalkan berhabitat hutan. Bukit di kawasan tropika lembap tidak sesuai ditarah dan diratakan. Ini hanya akan mengundang hakisan melampau dan tanah runtuh.

Pembangunan di kawasan perbukitan sepatutnya mengikut topografi sambil mengekalkan ce-



run asal. Sementara pembangunan di dataran limpah mengekalkan sebahagian daripada hutan tanah bencah bagi menghindar proses banjir.

Kesejahteraan komuniti

Masyarakat dan kepimpinan negara perlu menyedari HSK bukan sekadar hutan dan landskap hiasan bandar. Ia memainkan pelbagai peranan penting dan khususnya untuk kesejahteraan komuniti bandar.

Kehadiran hutan berupaya mengekalkan suhu nyaman bandar dan fenomena pulau haba pula dapat dikurangkan. Hutan juga berfungsi memerangkap sebahagian daripada air hujan, mengurangkan hakisan tanah dan ke-

jadian tanah runtuh. Ekosistem hutan bandar adalah sistem mitigasi penting untuk menghindar bencana alam, khususnya banjir kilat dan gelinciran tanah.

Fungsi perkhidmatan hutan juga sebagai penyerap gas karbon dioksida punca fenomena pemanasan global. Derigan kehadiran jaluran hutan bandar, gas rumah hijau yang dihasilkan oleh kenderaan dan industri mampu diserap oleh ekosistem hutan bandar, dan usaha kita yang beriltizam bersama komuniti antarabangsa untuk mengurangkan pencemaran gas pencetus perubahan iklim mampu dilaksanakan.

Hutan juga kini menjadi aset ekopelancongan penting negara. Jika di negara maju, komuniti bandar perlu keluar dan memandu seharian untuk menikmati keindahan hutan, di Kuala Lumpur hutan berada di hadapan pintu belakang rumah.

Kehadiran hutan bukit, hutan bencah dan hutan permatang mampu menjadikan Kuala Lumpur, bandar raya di dalam hutan berpotensi sebagai destinasi ekopelancongan bandar terkemuka dunia.

Walaupun, di bahagian utara dan timur Wilayah Persekutuan Kuala Lumpur masih dikelilingi oleh HSK, hutan di dalam Kuala Lumpur tiada ternilai harganya, ia semakin berkurangan dan mungkin mengalami kepupusan. Ada yang menyatakan, untuk memulihara hutan di Kuala Lumpur, bagaikan 'nasi telah menjadi bubur', namun saya yakin Kuala Lumpur boleh. Bubur boleh dinasikan!

Komentaar



Prof Emeritus Ibrahim Komoo

Penulis ialah Ketua Kluster, Sumber Asli dan Alam Sekitar, Majlis Profesor Negara (MPN) dan Felo Utama, Institut Alam Sekitar dan Pembangunan (LESTARI), Universiti Kebangsaan Malaysia (UKM).

Info

Bandar raya dalam hutan

→ **Dasar pembangunan** bandar perlu memberikan perhatian yang serius mengenai keseimbangan antara kawasan pembangunan prasarana dan kawasan hijau.

→ **Beberapa taman** lebih kecil perlu dibina di antara satu pusat bandar dengan pusat yang lain.

→ **Masyarakat** dan kepimpinan negara perlu menyedari HSK bukan sekadar hutan dan landskap hiasan bandar.

Keratan muka depan BH semalam.

